

- देशभर मांय आज बाल विवाह मुक्त भारत राष्ट्रीय अभियान सुरू व्हयो-प्रदेश रा न्यारा-न्यारा जिलां मांय ई जागरूकता कार्यक्रम राख्खी ज्या।
- रेलवे घणी तेज चालण वाळी गाडियां री डिजाइनिंग अर निर्माण रो काम सुरू कीनो।
- एस.ओ.जी. फर्जी उम्मीदवार रे जरिये परीक्षा पास करण रा मामला मांय आज चार जणा ने गिरफ्तार कीना ।
- केन्द्रीय जनजातीय कार्य मंत्रालय रा ट्राइफेड री ओर ऊं जयपुर मांय 29 नवम्बर ऊं आदि महोत्सव राख्यो जावेला।

000

देश मांय में आज बाल विवाह मुक्त भारत राष्ट्रीय अभियान सुरू करी ज्यो। इण रो मकसद देश मांय बाळपणा मांय ब्याह री रीत खत्म करणी है। महिला अर बाल विकास मंत्री अन्नपूर्णा देवी अभियान री सुरूआत करता थकां कह्यो के सरकार देश रा 130 जिलां मांय ओ अभियान चलायो है। वे कह्यो के बालपणा मांय ब्याह न केवल गुनाह है बल्कि मानवाधिकारां रो ई उल्लंघन है। केंद्रीय मंत्री कह्यो के बाल विवाह मुक्त भारत अभियान केवल 10-15 दिन रो आयोजन नी है, बल्कि एक लगातार कोषिष है। कार्यक्रम रे दौरान मंत्री अन्नपूर्णा देवी बाल विवाह मुक्त भारत पोर्टल रो अनावरण ई कीनो। ओ ऑनलाइन प्लेटफॉर्म बाल विवाह री रीत रे खिलाफ जाग जगावण, बच्चां रा ब्याह रोकण अर बाल विवाह रा वाक्या री जाणकारी देवण रा अभियान बाबत विकसित करी ज्यो है।

दिल्ली मांय राख्खी ज्या कार्यक्रम मांय जयपुर समेत 7 जिलां ऊं नामित बाल विवाह प्रतिषेध अधिकारी ई मौजूद रह्या। प्रदेश रा न्यारा-न्यारा जिलां मांय ई महिला अर बाल विकास विभाग री ओर ऊं कार्यक्रम राख्खी ज्या। आं मांय सिरकत करण वाळा दिल्ली मांय राख्खी ज्या कार्यक्रम ऊं ऑन लाइन तरीका ऊं जुड्या। ई सागे ई जिलां मांय बाल विवाह मुक्त भारत बणावण सारु शपथ रा कार्यक्रम राख्खी ज्या। **सवाईमाधोपुर** मांय जिला कलेक्टर शुभम चौधरी अहलकारां अर कर्मचारियां ने बाल विवाह रे खिलाफ शपथ दिरायी। बारां जिला री कलमड़ा ग्राम पंचायत मांय बाल विवाह मुक्त भारत अभियान रे तैत जागरूकता कार्यक्रम राख्खी ज्यो। ई दौरान मौजूद लोगां ने बाल विवाह मुक्त भारत बणावण री शपथ दिरायी ज्यी अर बाळ पणा मांय ब्याह री रोकथाम सारु बणायी ज्यी कानून अर चाइल्ड हैल्प लाइन रा बारा मांय जाणकारी दीरीजी। **ब्यावर** मांय जिला कलेक्टर डॉ महेन्द्र खडगावत अहलकारां, कर्मचारियां अर जनता ने बाल विवाह री रोकथाम तैय करण अर बाल विवाह नी व्हेवण देवण री शपथ दिरायी। जिला कलेक्टर बाल विवाह मुक्त भारत कार्यक्रम रा पोस्टर रो विमोचन ई कीनो। पाली जिला रा सादड़ी री पीएम श्री बालिका स्कूल मांय जागरूकता कार्यक्रम राख्खी ज्यो जिण मांय बाल विवाह ने सामाजिक बुराई बताता थकां इण रा गलत नतीजा री जाणकारी दीरीजी।

000

प्रधानमंत्री गरीब कल्याण अन्न योजना ऊं देश मांय 80 करोड़ ऊं बत्ता लोगां ने फायदो मिल्यो है। उपभोक्ता मामलात, खाद्य अर सार्वजनिक वितरण राज्य मंत्री निमुबेन बंभनिया आज लोकसभा ने एक लिखित जवाब मांय आ जाणकारी दीनी। वे बतायो के गरीब तबका री जनता रो माली बोझ कम करण रा मकसद ऊं चलायी ज्यी मुफ्त अनाज मुहैया करावण री ई योजना री मियाद जनवरी, 2024 ऊं आवता 5 साल ताई बधा दीरीजी है।

000

रेलवे घणी तेज चालण वाळी रेलगाडिया री डिजाइन अर वां ने बणावण रो काम सुरू कर दीनो है। रेल मंत्री अश्विनी वैष्णव आज लोकसभा मांय एक सवाल रा लिखित जवाब मांय आ जाणकारी दीनी। वे बतायो के इंटीग्रल कोच फैक्ट्री, भारत अर्थ मूवर्स लिमिटेड सागे मिल र हाई स्पीड ट्रेन सेट री डिजाइनिंग अर निर्माण कर रही है। अ गाडियां 280 किलोमीटर प्रति घंटा री गति ऊं दौड़ सकेला। आं गाडियां रा हर एक डिब्बा माथे करीब 28 करोड़ रुपया खर्च व्हेला। एक और सवाल रा जवाब मांय रेल मंत्री बतायो के वंदे भारत एक्सप्रेस गाडियां री गति कम करण रो कोई प्रस्ताव नी है।

000

स्वायत्त शासन विभाग रा प्रमुख शासन सचिव राजेश यादव दिसम्बर मांय व्हेवण वाळी राइजिंग राजस्थान ग्लोबल इन्वेस्टमेंट समिट री तैयारियां रो आज जायजो लीनो। जयपुर मांय राख्खी ज्यी मीटिंग मांय वे शहर री साफ-सफाई, कानून व्यवस्था अर आवण-जावण रा प्रबंध रा बारा मांय जरूरी हुकम दीना।

000

फर्जी उम्मीदवार ने परीक्षा मांय बिठा र इम्तिहान पास करण रा मामला मांय एसओजी आज एक लेक्चरर अर तीन पीटीआई ने गिरफ्तार कर लीना। आं चार ई जणां रे खिलाफ एसओजी ने वॉट्सऐप हेल्पलाइन नम्बर माथे शिकायत मिली ही। फर्जी तरीका ऊं पीटीआई बणबा वाळा 3 ई आरोपितां रा कागजात री जांच मांय वां री बैचलर ऑफ फिजिकल एजुकेशन (बीपीएड) री डिग्री फर्जी मिली। ई पाछे बाड़मेर अर सांचौर मांय न्यारी-न्यारी ठौड़ां ऊं आं चार ई जणा ने गिरफ्तार कर र अदालत सामी पेश करी ज्या, जठे ऊं वां ने 7 दिन रा रिमाण्ड सारू भेज दिया ज्या। एसओजी रा अतिरिक्त पुलिस महानिदेशक वी.के. सिंह बतायो के राजस्थान लोक सेवा आयोग कानी ऊं लीरीजी वरिष्ठ अध्यापक (माध्यमिक शिक्षा) ग्रेड सैकंड-2022 भर्ती परीक्षा अर राजस्थान कर्मचारी चयन बोर्ड री शारीरिक शिक्षक सीधी भर्ती परीक्षा-2022 रा मामला मांय आ कार्रवाई करी ज्यी।

000

केंद्रीय जनजाति कार्य मंत्रालय रा भारतीय जनजातीय सहकारी विपणन विकास परिसंघ –ट्राइफेड री ओर ऊं जयपुर मांय 29 नवम्बर ऊं आदि महोत्सव राख्यो जावेला। दस दिन रो ओ महोत्सव जनजातीय गौरव दिवस वर्ष 2024 रा सिलसिला मांय राख्यो जा रह्यो है। जयपुर मांय जवाहर कला केन्द्र रा शिल्पग्राम मांय राख्या जावण वाळा ई महोत्सव रो उद्घाटन राज्यपाल हरिभाऊ बागडे करेला। महोत्सव मांय हर शाम जनजातीय सांस्कृतिक कार्यक्रम ई राख्या जावेला। इण मांय राजस्थान, हिमाचल प्रदेश, पश्चिम बंगाल, मध्यप्रदेश, गुजरात, छत्तीसगढ़, उत्तराखण्ड अर पूर्वोत्तर राज्यां रा जनजातीय कारीगर अर शिल्पकार सिरकत करेला। महोत्सव मांय 120 स्टॉल्स रे मार्फत जनजातीय शिल्पकारां कानी ऊं बणायी ज्या सामान रो दरसाव कर्यो जावेला।

000

55वां भारतीय अंतर्राष्ट्रीय फिल्मोत्सव मांय आज नामी फिल्म निर्देशक तपन सिन्हा री फिल्म यात्रा रा बारा मांय खास कार्यक्रम **मस्पेक्ट्रम एंड द सोल** राख्यो ज्यो। अर्जुन चक्रवर्ती, एन मनु चक्रवर्ती अरनामी अभिनेत्री शर्मिला टैगोर री सदस्यता वाळो एक प्रतिष्ठित समूह तपन सिन्हा री अतुलनीय निर्देशन कला रा बारा मांय विचार बताया। आकाशवाणी सागे बातचीत करता थकां अर्जुन चक्रवर्ती बतायो के तपन सिन्हा 48 फिल्मां बणायी पण किण ई मांय विषय अर शैली ने ओजू काम नी लीरीजी। इण ऊं पैली अंतर्राष्ट्रीय प्रतियोगिता रो जाण्यो-माण्यो फिल्मकार आशुतोष गोवरीकर री सदरत वाळो निर्णायक मंडल ई साल आई फिल्मां रा बारा मांय जाणकारी दीनी।

000

राजस्थान कर्मचारी चयन बोर्ड 1 ऊं 3 दिसम्बर तांई पशु परिचर सीधी भर्ती परीक्षा 2024 करावेला। आ परीक्षा जयपुर रा 130 केन्द्रां माथे करायी जावेला। परीक्षा देवण सारू 2 लाख 60 हजार 163 उम्मीदवार नाम मण्डायो है। परीक्षा सारू जिला कलेक्टर रा दफ्तर मांय कन्ट्रोल रूम बणायी ज्यो है जिण ऊं फोन नम्बर 0141-2206699 माथे संपर्क कर्यो जा सके है।

000

कोटपूतली-बहरोड़ जिला रा पावटा मांय आज महिला अर बाल विकास विभाग री ओर ऊं **पोषण भी पढाई भी** थीम माथे खास सिखावण शिविर सरू व्ह्यो। तीन दिन रा ई शिविर मांय बच्चां ने कुपोषण ऊं बचावण, शाला पूर्व गतिविधियां, खेल-खेल मांय पोषण अर पढाई री समझ समेत न्यारी-न्यारी जाणकारियां दी जा रही है।

000

भरतपुर रा केवलादेव घना राष्ट्रीय पक्षी अभयारण्य हलका मांय सड़कां सुधारण सारू वन विभाग करीब पौने चार करोड़ रुपया मंजूर कीना है। उद्यान रा प्रवेश द्वार ऊं अघापुर तांई करीब 7 किलोमीटर लंबी सड़क ने डामर री बणावण, इंटरलॉकिंग अर मरम्मत रो काम सरू करी ज्यो है।

000

नीति आयोग कानी ऊं चलायी ज्या अटल इनोवेशन मिशन रा तहत देशभर मांय खोली ज्यी 10 हजार अटल टिकरिंग लैब-एटीएल मांय ऊं साढ़े 5 हजार ऊं बत्ती गांवाई हलकां मांय काम कर रही है। सांख्यिकी अर कार्यक्रम कार्यान्वयन राज्य मंत्री राव इंद्रजीत सिंह आज लोकसभा मांय एक लिखित जवाब मांय आ जाणकारी दीनी। वे बतायो के एक हजार ऊं बत्ती अटल टिकरिंग लैब आकांक्षी जिलां मांय अर 375 ए.टी.एल. आकांक्षी ब्लॉक्स मांय है।

000

राष्ट्रीय साइबर रेंज-एनसीआर रा पैला दौर री आज नई दिल्ली मांय सरूआत करी ज्यी। इण ऊं साइबर खतरां रे खिलाफ जांच अर सिखावण रा मौका मिलेला। राष्ट्रीय रक्षा विश्वविद्यालय रा निदेशक कर्नल निधिष भटनागर इण रो उद्घाटन कीनो। ई मौके वे कह्यो के ओ प्लेटफॉर्म खास साइबर सुरक्षा बुनियादी ढांचा मांय देश ने खुद रे पाण ऊबो करण री दिशा मांय खास जतन साबित व्हेला।

000